

其際以馬通火煨之三十日發火視之錫中悉如灰狀中有累
累如豆者卽黃金也內土甌中以炭鼓之十煉之並成也率十
斤錫得金二十兩唯長沙桂陽豫章南海土釜可用耳彼鄉土
之人作土釜以炊食自多也

治作赤鹽法

用寒鹽一斤竹寒水石一斤又作寒羽理一斤又作白礬一斤
合內鐵器中以炭火火之皆消而色赤乃出之可用也角里先
生從稷邱子所授化黃金法先以礬水石二分內鐵器中加炭
火令沸乃內汞多少自在攪令相得六七沸注地上卽成白銀
乃取丹砂水曾青水各一分雄黃水二分於鑪中加微火上令
沸數攪之令相得復加炭火上令沸以此白銀內其中多少自
在可六七沸注地上凝則成上色紫磨金也

治作雄黃水法

治雄黃內生竹筩中一斤取加硝石二兩覆薦上下封以漆骨
丸內醇大醋或作醇苦酒中埋之深三尺二十日卽化爲水也作曾
青水方及礬石水同法但各異筩中耳

小兒作黃金法

作大鐵筩成中一尺二寸高一尺二寸作小鐵筩成中六寸瑩
磨之赤石脂一斤硝石一斤雲母一斤代赭一斤硫黃半斤空
青四兩凝水石一斤皆合鴉細篩以醯和塗之小筩中厚二寸